

四庫全書

集部

欽定四庫全書

景文集卷五十六

宋 宋祁 撰

啓

回楊舍人啓

比自拜恩已嘗伸慶恭以掖居之秘參福於霄垣方贊
之嚴慎司於朝冊號爲凝切常佇儔良是以言繹絲綉
暢猷爲於有典筆含雷雨演膏潤於多方果值上才聿

光崇簡伏惟舍人氣涵先覺道肖至和薄三代以寡英
沂九流而質要奏文闕下嘗被賞於同時折論書林弗
取資於孟晉參籌計幕之次磨墨翠坳之餘帝誘乃衷
公符斯議試言丞相之府初不淹時一覽尚方之帷久
之稱善程篇甫訖寵渥俄頒排華路以趨翔竦儒紳之
歆艷改紆銅綬分署判花固已兼謏羽而修詞接嚴徐
而布武慶雲在上彌增天采之鮮瑞鷗來廷恣覽德輝
之茂適欣顙俊會枉騰書緣抒頌於丁辰厚爲言於推

穀青松云茂信爲寒日之榮嘉穀已登愈重前糠之愧
第銘謙益徧詫朋方感懇所叢竒觚安叙

回呂舍人啓

伏承茂膺制檢進直辭垣伏惟慶慰恭以舍人貫道幾
深陶天萃美顧九言而視履濟百行以保躬適時重熙
襲慶憑厚綬華若若踵仁者而與游筆語翩翩追大夫
之能賦早膺試牘參籍道山春容大音汗渙遐蹠屬四
戶上選三俊程能首甄譔次之才俾草溫純之命程文

旦上成命暮頒祓芝寶以攝文旅藥階而布武綸由絲
出甫光王者之言羸與經偕更盛相門之學得賢爲盛
有道維歡敢圖謙冲猥貺題啓叙撫塵之舊好衍推轂
之餘詞糠粃簸揚久負先登之愧松筠茂悅今同彙進
之榮欣感併銜精微拙喻

代回呂舍人啓

近審榮被恩章進升辭禁慶儀未展私抃已深恭以舍
人天稟粹純道資宏博飄纓初筮給牘秀科每冲挹以

自安久盤桓而不進豫章美幹茲歷歲以大成韶樂正
音非至聰之攸舍果膺試札入掌命書矧惟世職之修
尤示朝咨之愜方且雍容豹式冠映士林三代追風
斯文於深厚十行視草賁神化於丹青甫頌得賢遽煩
點翰數陳盛美感慨亨期顧茲鐘漏之餘厚齒紳綏之
後雖云閒外尚克銘藏

鄭州到任謝兩地啓

伏奉去年四月十九日詔書還舊職兼龍圖閣學士知

鄭州已於五月二十四日赴任訖避親辭劇得可賜落
大造燭幽舉宗蒙章伏念和天資拙甚時事昧然盡信
古言自安素守數忝帥領并付便宜以方有爲之時責
非所習之伎難稱職恩弗汝瑕擢領計廷正妨樞省
引訴既苦成命改班帖以美資假之便郡地雖三輔靡
及於浩穰人匪獨賢乃叨於燕息此蓋閣下邁種陰德
推行上慈罔俾處於嫌疑遂遑寧於轉側敢忘忠敬歸
報坯陶

謝李太傅惠先令公碑文啓

比者太傅圖昭先烈仰達奏封詔大手以抒文咨健毫
而潤石義均頓首名煥京阡裝搨至精布傳彌廣偕沁
波而不腐慶貂葉以滋華謂接曩游亦詒副本申復披
文之妙周知濟美之勤感戢所叢名言罔喻

陳州到任謝兩地啓

昨奉敕移知本州即以今月二十五日到任盤上訖收
跡遠藩改麾近屏詔蠲入謝道便之官循復寵私叢并

惟愧伏念初性惟疏狷仕偶休嘉嚮自書林得持從橐
緣不材而冒祿名多謗之抵巇大度掩容上司保恕許
寬漳濱之疾遂假淮南之章幽績殿科危心疾首謂應
罷斥翻及采甄內移六郡之雄居重四藩之選府華地
輿物衍歲穰癯質早衰顧班春而已強寒根再茂寧得
地以當然上本曲成實緣僉啓斯蓋閣下敷施陰德章
叙庶官俾下無失職之嗟使朝收善善之實猥容完士
胥洎大鈞冀自力以及羣庶有成而論報析符云恪翹

閣猶賒徒爾嚮風恨無飛肉

謝官啓

昨蒙恩改前件官依舊充職者歲當大比秩許稍遷撫
己以思愧顏無寘竊念初早以懵學弗逮遠猷孟軻於
事而迂安仁謂拙而信託庇材館竄名道山向緣一書
之奏已叨三署之擢且煩申勅別計累勞因濫天官之
擬遽陪司寇之屬不稼胡樨河干之詠已興有祿而軒
國人之刺奚弭諒由褒品始克進升斯蓋閣下封殖危

根青黃斷木護短無瑕示訓於師門兼愛宜廣期錫於
士類階爲虛稱誤及榮途敢不三陌爾躬十思乃事少
貧云補無墜獎憐巾幘未期簪屨增戀

謝直館啓

案仁宗本紀修內告成在明道元年十一月初於此時試直史館

今月十九日蒙恩充前件職者祇服言綸入塵藏室用
浮才表愧溢情涯竊念初樸邀無能倥侗有素世微軀
仕天與數奇甫冠而孤未堪多難過時乃學遂不名家
由鄉老以賓興參仕途而揚歷間關吏事汗巖塵容入

陪上計之期行俟有幽之黜至今舍垢善養如春回備
責於最科俾改升於鄉屬上庠之使中詔甫留倚席窮
年離經之效如天有斗非取於挹漿譬馬食肝敢言於
知味庵銜親恤自屏民塵揭白日之昭昭臥青漳而庵
庵縞祥有訖食息偶存不謂執政之臣請間言上旁呼
俊茂并及妄庸趣以復官敦其給札會斯干之攷室括
裨海以蒙禧別真朝班入趣會表逮膺試可愈忽無文
晨葩並春枯楊知其難艷天髦同轡駘步判其先顛幸

得罷歸以懲妄進而睿明收采承弼贊襄帖紬史之美
名疏羣材之缺望揆能隘薄聞命震慙且古有載言代
爲丕訓聞宣父之歎猶及闕文有子長之才乃稱實錄
國家建明天載以賁大猷招致又英茂充秘館磨研編
削盛東觀之游供帳餐錢抗開元之體罔深道訓曷宿
官成顧茲畫餅之名超據采薪之地諒緣外獎方玷榮
階斯蓋伏遇閣下均愛彙茅助封芄穢務英才之樂有
味其言極薦寵之私豫爲之地假冷風之末力塗斷木

之繁文密導茂恩俾加無狀敢不懋明乃志慎伏攸箴
遵道以行惟書盡信靈龜自守潛戒於朶頤鳴雞有晨
不愆於如晦庶逃司敗罔忝知人

上參政侍郎啓二首

伏蒙執事以初叨秩省闈特賜手筆垂諭長跪申誦以
榮以惕竊惟紬次大典淹久彌年終篇程御功先總領
先達樂育宗工獎成收錄餘勤施及無狀第賞之冊竄
名其間不稼取禾奚堪於此冬曹妙選誠如來誨但昔

光德舉官由才重令承人乏任與望輕景行在先踵武
增愧資材素稟難乎勉強姑勵蹇拙不隸刑書結庇本
根有望於此卑情無任佩荷之至慶幣申沉已具別紙
敷叙謹手啓附還使布謝不宣

翟邑之別條馬華歲雖褰輔櫛驛宿昔傳達金玉嗣音
係道實來然凝素中蘊未始爲釋者良以風聲在聽不
如音旨之密也嚮蒙手教適會臥病移告不偕時答故
以爲恨再得題訊甫屬有痊昏瞶洵思未任牽勉修謝

淹久政由此耳矧君侯雅度多可寧嬰僕以筆牘常儀
哉承贊畫有裕日休厥問而獻文在旦方傾竚於南闕
之前願益自愛究榮圖而承俊範也不宣

回晁參政啓

伏審顯被制恩榮聯宰政伏惟慶慰恭以參政器函道
興業總天常膺旦暮之聖期踐凝嚴之世職含光弗照
求福靡回卓爲高風飴布輿議嚮者密銜指使臨訊軍
謀擁車傳以適勤會台庭之會錫宸心素定恩策前頒

逮此清明之朝趣對延登之寵尚聆秉德未即當仁申
雅奏以讓還枉公函而敷諭欽惟褒命久協朝言望改
素懷即符羣望銜感欣竚萬一罔宣

代回宋參政啓

恭惟參政志懷隱正履尚淹華契賢運以露才館懿文
而絢國十行深厚抗寶訓於楚珩三接從容藹詳言於
漢席茂昭公實克厭辰猷帝實簡心邦斯詔德果近陪
於四近爰關決於萬幾僉岳同辭薦紳動色尚固謙冲

之節少留進拜之期垂況善辭但欽謙概竚聆敦勸式
契歡瞻

回程左丞啓

比者執事茂將明命近撫輿藩涓日惟良班條云始上
風甚樂聊資造適之宜河潤有餘方竚帡幪之賴敢圖
謙損亟枉誨音絢邦範之有儀敷感衿之多緒永言申
誦敢怠中藏獻歲方春趨風未日慎持齋疾用副眷懷

盛右丞問候啓

欽定四庫全書

卷五十六

伏自執事均賢樞筦改秩臺機茂選與藩聿開尊府方
春臨境班寬大之詔恩即日洽和又神明之錫祚欽惟
著範夙係人瞻雖四國于宣聊資於邦殿而六符相比
遲正於乾台由黃霸之治功啓平津之封冊仰祈晏處
務嗇粹真顧舊物之惓惓遡餘風而叩叩乃心攸向點
翰匪宣

上壽州張侍郎啓

恪守魚符悵懷鵷閣嘗擬中軍之義府得瞻天老之台

華坐邈三洲邈成千里茲者侍郎緣漢章之代損天鉉
之崇勅記室以授辭付行郵而垂問大丞相之重遂屈
移書一逢掖之卑敢煩鈞禮餘波沛潤幽谷蒙暄諒緣
拜賜之階前啓知歸之地感慙交集拙訥難宣

上內閣侍郎啓

僂焉孤生庇於大賜恩紀踰分年所寢多均百穀之仰
成殆一天之絕擬固當時上咫尺之紀參候門闌之廝
奈何日力中疲官常外缺錄未成而氣耗瓶已挈而知

空寢違發藥之言自取有皮之慢瞿然內熱怵爾神馳
恭承鎮靜之餘允膺方穀之賜伏惟內閣侍郎道合崖
畧行絕町畦據百行之樞融其素履御萬物之馬蹈乎
大方躬易退之一辭取不回之五福偃息爲樂寬柔用
彊樹之清風式是南國然而侍從之事固有待於嚴徐
出處之宜必參行於夷惠二官圖任三節行趨願昭體
於當陽益緣經於慎夏奮庸所屬橫目同歸傾袞衮衣
之來再望簾帷之末禱悰兼萃弱翰匪宣

賀參政侍郎啓

伏審光奉制書進知機務伏惟慶慰恭以參政侍郎函
德之厚剛中而明旅力四方寅亮丕績邦被風教用餽
民瞻天賜耆明俾輔王室果容魁壘之彥入佐調燮之
宜追鋒疾驅前席延拜揭日當午物無斜陰推雲崇朝
澤有餘潤赫蹠行下薦笏胥歡和方守塞防側聆恩冊
振襦私喜調府莫諧

回泗州知州啓

嚮緣持橐懇乞爲藩蒙大度之包荒俾孤生之從欲汔
茲臥治正謂藏瘝敢冀執事推謙下之私布恩勤之誨
候爰疾走墨妙前揮安秋蒔之危懷露寒松之晚節靜
言銘戢迥邁等夷一水通流六條異守晤言未日悵素
增勞

上杭州蔣密諫啓

昨過都之辰凡五月始得手教承以便時止官下福祚
蕃衍甚休然音容緬邈悵悵參積雖玉音滿紙瑤華在

前而心府精蘊疇能宣其一二也希魯舊得雅望治績
雋聲出爲方國翰垣入爲吾僚景式樂邇鄉部遂丐郡
麾然朝須老成治有連最雖爾靜勝恐難滯留宜專舍
冲氣顯介眉艾副前席之延拜云秋暑猶劇加進常膳
齋仗回占答不盡萬一悵悵

上益州程密學啓

茲者足下改擁恩節移總使藩近職增華宸眷加等洒
然衆望協于至公益治績久升而雅望滋重是以掩西

南之奧付明哲之才風行令先雨浹恩始想便飾追蓐
抗飛旗徑鉤梯啓雲幕則中和袴襦之詠尅日而至上
都矣但春夏之序次舍少煩千萬慎齋荷集純祉謹手
啓通慶並詞動止

上蔡州韓諫議啓

承以盡言觸宰相出守近州初聞之甚駭悵俄而釋然
古之人當官而行亦皆如此堅車大舸不能不小留却
而後臻於所趣也雅懷想以此自慰但暑熱館次少爲

勞煩矧素簡上心當不遠而復慎護齋疾

致韓果州啓

官次所限不克與故人一交臂爲樂悵悵奈何殿中趙
御史來稱盛美不容口以爲治狀爲東川第一聞之不
勝欣慰今世龍虎酥酪舉集足下之門顧不盛哉慎調
寢饗以迓來寵老夫蒙免無他荷庇不淺感戢感戢不
宣

回資政李侍郎啓

茲者執事亟上囊封願還機柄伏蒲間請當宁動容緣
高節以重違藹朝言而胥仰睿襟申眷恩數具蕃進通
殿籍之華升貳天卿之峻功名弗處自安利徃之常荃
宰相期彌見親逢之盛流風所洎偷俗爲敦輒冀謙懷
俯貽公翰味辭條之敷衍激心術以銘藏矜式所深文
陳非叙

代人求薦

周升俊造美王國之思皇漢舉賢良下公車而深詔所

以辨官才於天府建首善於京師綈黻具存簡編可復
驗文王之頌多士以寧攷史班之辭得人爲盛萃茲茂
典屬在昌辰國家滙璧沼之淳流紬鴻都之清議蕩百
王之季舉三代之英頓天網以該賢掩羣珍而顯俊發
策三道許人事而直言馳傳一封命計偕而續食鳴騶
入谷振鷺充庭旋屬宣室思賢金華嚮學深念舉鄉之
制頗垂青實之文亟詔方州精求間傑苟匪挺橫秋之
茂操秀突弁之瓌姿擅響天球聯華序寶則何以垂光

闕里豫五六而舞雩摘藻漢廷冠三千而削牘必資鴻
碩方協選掄如某者牆宇非高風流素淺魏人持帚享
徒費於千金越俗彎弧近不踰於五步徒以幼聞令訓
長襲素風食熊掌以未多方思慕義啖牛心而素少妄
冀知名蹭蹬窮途流離雅節入崔公之篋深愧家人帶
倪掾之經但期都養頃歲濫巾俊乂接武澤宮勵經首
之牛刀方謀必割弭街亭之師節遽拜先登撫昌志以
無成慟良辰而將晚揚雄素吃徒自取於扶疎韓信少

貧分無求於推擇沉冥散地游泳太和蓋內省以甚明
亦歸飛而有素時或月園追蓋烟驛披文廣絕交之篇
尚思抵几讀課功之令幾至廢書實因感慨之時頗負
飛冲之願然而東家歷聘非無載質之勤馮異責功未
舍收榆之志誓驅騖緩仰掇翹英今則充賦匪遙追鋒
盡在人言可畏有同抱玉之家文士相輕蓋甚鏤金之
數深惟窮陋最在孤平愧居多謗之間靡有先容之援
陳琳奮藻沉奮虎以非工邢邵干時恐無風而自落永

言孤藐宜惻眷憐閣下俯念頑疎曲施全度借一言於
華哀潤九里於靈河或因筌緒之間少賜青黃之飾則
要駕之馬尚千里而可求失旦之雞庶一鳴而爲効發
身奮跡不自他門卑情無任激切待命之至

鎮府謝上任與兩府啓

茲者祇循詔旨惕復官箴引組揆榮捫襟擁愧伏念初
學非企古知不逮人向丐冗閒本藏衰晏材短多負志
小易安不圖朝僉誤委邊劇護師萬衆綿地六州遇事

得便於宜勉行輒進其秩中軍攝總誠宜卻穀之長年
列將稟承巨如倪寬之懦武又况數奇者罕得如志責
實者尤難副名審計孱疎交承受授所賴閣下道包於
廣仁益乃疵被菑壤以蒙春穿郅家而引照鬱爲華寵
庸賁孤生尚圖軒輊之能無恩平鐫之誚州符在手賓
閣馳魂溯戀所并鋪宣罔逮

益州謝兩府啓

昨自定武軍被去年八月詔書改吏部侍郎仍知益州

以今年二月二十日到任訖守邊無狀易地蒙褒任非
植材寵寶浮願即超治所祗服彝箴伏念和本以屬文
早陪禁籍後緣學政稍習吏條向詣朔郵臨總師節辭
窮一輶之守衆爲寒心語踰三至之多每蒙辨謗成瓜
四熟嶺雪徧紛何圖幽黜之期更忝驟遷之幸天卿貳
秩坤絡巨藩寄任光隆倫輩欣羨此蓋閣下財輔丕繹
謀熙庶工含容予取之求成就汝偕之往矧蜀歲豐足
益士文柔法令謹嚴盜賊衰弭雖率愚短可及靖嘉但

身遠者心危驚禽有以虛墜援寡則讒勝楹木爲之先
殫敢丐大鈞終全一介班春方始詣府未辰榮感所叢
訥澀非叙

上都運待制啓

伏惟雲章賁宇待對列於清班星昴分街調食歸乎雄
部聿參盛選允屬兼資都運待制閱器雅材清規茂識
早協邦華之望游登畫伐之成簪筆繩違矢嘉言而罔
伏操籌執簿衍精計於無垠克協公僉遂光禁路據兩

河之會悉委於均輸沿八使之名更資於澄察適聆來
譽增仰末輝敢謂謙私首詒芳問著藏巾衍非替即日
之榮訂況松筠更識他年之舊庇陰有所論感無倪秋
物寢衰道腴祈勝自餘馳想焉足容聲

上淮寧知府待制啓

協守官經坐叨康稍志衰學落年長病侵非無恩紀之
隆絕修書聘之謹良以道機攸照容有江湖之忘夙契
所諧不煩膠漆而合輒緣至眷敢擯彝儀待制允蹈大

中孔甘亮節危言滿於臺閣嘉績最於藩維氓誦傳聞
朝謀僉异方且進搗德柄俯眷儒紳占鈴史以布辭戒
候爰而齋況蔚如翠柏自凌歲律之寒愛若青氈知是
君家之舊內惟刻頌永誌褒憐夷道右馳孤誠南注願
保春塗之祉助嗇天倪之和傾況於茲一二非列

授待制謝兩府啓

比者被獎中宸通班秘禁褒甄匪序榮灼參懷竊念初
祐薄早孤學勤晚就雖謀干祿止辨易農寢簪紱於朝

閨間磨鉛於史室自忘其鄙日慎乃修升直殿螭之坳
入贊牢盆之計車鼙鼓鷄能無失性之憂燕麥兔葵正
恨取名之過漸圖寡悔少贖空餐敢冀穎卬曲垂眷逮
因避親於具爾不緣進於道司直寘過聯專由睿擢在
人畏假即受慙虛矧茲華閣之嚴號爲規地之密字文
成葉羅紉於珍圖奎勢如鈎上儀於寶宿詎應完士入
儲王僚跡夫誤寵之來亦有爲容之素此蓋閣下助陵
敷育因填埏和謂鳬鶴之異宜俾鑄盧之參使遂容昭

世蔑歎滯才方且疏淪乃心靖恭爾位倣攸箴之所服
戒求福之斯回庶息煩言歸酬至鑒被巾幘而尚遠寓
筆舌以奚宣

回密州孫龍圖啓

一昨內閣學士避榮辭禁就偃候藩戒東方千騎之嚴
盛顯父百壺之餞奉將使節兼過鄉枌交相如牛酒之
歡驗北海門閭之大茂遵吉旦臨布寬條暫厭承明之
遊非勞侍從莫如韓土之樂聯便養頤沉敦簡在之懷

難駐斜飛之勢湖風方切貽訊見存寘右座以昭銘款
東雲而增黯春祺茲始時養由加

引卷啓事

談彼上林雲夢之游蓋寡觀乎滄海冰夷之室已卑況
有歷造師閣上攀雋軌席陪珍之聘焜照宸猷嗣烝汕
之賢彰施國體誠非間傑曷竊題評如和者漫漶學疏
迂愚智短有門邊之翫髒徒取世譏乏竈上之掃除終
非時彥徒以幼專童刻長預師黌居體不勤惟書盡信

探二儀之精稜採六藝之潤芬曩以多難亟鍾先芬永
謝窮愁萬斛淒入肝脾故里一塵鞠爲禾黍撫箕裘之
弗競瞻丘壑以何歸藐是諸孤勉親編削披聲聖域刮
目翰場祝揚子之殪蚰但期速肖執黃中之賤虎幾歎
固窮伏遇國家祇邁鴻靈若稽典訓盡仆威械專講竅
文三世在天二宮闡化坐釐庭而訪道程夜石以觀書
深詔方州詳延俊選公車之府自鬻者千餘園橋之門
觀光者萬計洪惟丕烈卓冠常均是使採樵之夫率談

王道擊轅之鄙亦次頌聲獲陶被於餘風每游揚於素
蘊時或過秦抒論探穴求書勞者須歌登高以賦孔編
顏摘概覽於舊聞楚謠漢風潛抽夫餘韻諒非善著頗
近木強積是歲年盈於巾衍然而壽陵步蹇殆匍匐以
都忘長沙舞卑幾迴旋而不足櫟材增散榆思益瞑率
小子之斐然良乖詠歎當主人之適爾合在詆訶幸遇
閣下粹範丁辰懿文華國愛兼墨翟道廣太丘樹風鑑
於往圖聳人倫之先覺初是敢洮汰常累呈露庸音綴

邦彥之下陳備貢條之丕式藻繡輦輓助於采章唐
突璵璠自知其固陋伏望鑑茲平進導以先迷辨驥坂
之長鳴助沚莪之樂育因雲洒潤沛發於餘波撻埴索
塗俾進於遐武煦之暖律激以順風重念爲文相輕傳
之自古入門各媚孰肯爲言蕞爾孤生最云單跡抱玉
之家甚衆鑠金之口可虞敢祈護短之仁終賜援沉之
惠許鑢錙之有請冀豫神兵爲枯木之先容將成國器
方塵觀採彌極怔忡

上青州相公啓

伏念阻侍台儀遽殘冬筦液櫛戾質尚厠華光之筵蓬
曲守心時夢翹材之館惟偃藩之甫爾介嚮福以咸宜
閣下感會三儀昭明百度祥言順采爲有國之金湯正
色端朝失羣邪之倚著勤經大政辰告遠猷是以首封
蕭何比之左右手目送周勃謂之社稷臣丕績克咸常
均絕擬頃緣冲遜之雅重茲勞勩之均特開千社之封
聊罷萬樞之柄訟棠所芟先梓具存富貴而歸故鄉前

夸漢牒股肱之衛元首終輔舜圖冀嗇道冲上符天載
紳綏所詠坯冶攸依

兼龍圖謝兩地啓

奉中書劄子以初三讓便令授告敕者丹訴數聞成音
三郤願孤易奪恩重難違伏念初年景顏侵才力衰鈍
詔自西蜀歸領計廷屬有內避之嫌尤滯官聯之總蒙
便私請還授故資仍因進藩更帖新職但素願已獲舊
物盡歸又取美名實同詭遇瀝懇雖苦收渙莫能惟令

出之必行終降拜而升受此蓋閣下導仁下濟俾物曲
成愆多取以非廉畏罔功之求比誓勤夙夕冀報涓分



欽定四庫全書

集部

景文集卷五十九

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷五十七

宋 宋祁 撰

碑

復州廣教禪院御書閣碑

案復州漢竟陵地五代晉時改為景陵祁本傳

釋褐為復州推官當在天聖三年碑云
乾興元年意建閣在前碑文在後耳

昔者上帝冊書藏羣玉四徽之府神禹祕記著南方會稽之山若乃上聖蔚興含靈皆警彌文塞天淵之表遺

章倬雲漢之象溫瑜鏤翰崇樹規箴協三五六經之制
藥函真本頒貺方國鎮七千神靈之封用能蔽穹壤而
相傳在都邑而有副鼓之而天下動舉焉而能事畢鳴
鳴焚焚而珍圖焜照在在處處而神物護持者歟復州
者古為景陵郡棲地敞夷殖物繁夥濱帶江漢嘗被文
王之聲詩蔽虧宿莽流為騷人之悽愴神姦物厲之不
作民風國教之在柔居然吉祥是最殊勝直城西出一
里有院曰廣教乃唐禪師積公之經始大士陸生之攸

踐巧歷之算雖往故府之求多在邑井不改寒泉漱玉
而仰流岸谷相為洪碑生金而未泐肇為寶所垂乎百
禩觀其面勢盤據標勝呈露卻背平野前瞰大澤屈到
嗜芟之後產幽流不穢長者揮金而側布檀施嗣臻佛
事具足以莊嚴都人讚歎而踴躍真宗咸平初適追來
孝執競先烈紬禁中茂陵之聚備天下名山之藏乃以
太宗皇帝御製御書凡百軸下賜焉照之天光震動沙
界成鈎之文煥布辟惡之香紛郁霧圖蘭葉蓋天姥之

嘗窺赤水珠胎非象罔而誰得乾興元年景陵縣史譚顯內發信誓謀就功德捐緡錢數十萬建為重閣遷賜書而藏之木摩而匪彫棟隆而弗撓鳴輦斯飛以異狀陽馬如舞而四承巍乎覺苑之增雄凜然天魔之潛衛奕奕雲構瞻咫尺威而如在灝灝宸懿賜書文之一同推而上之思議安及者已先是天禧中長人邢公若思以寶坊雄峙審篇申錫非大精進疇克奉行乃以僧惠嵩為傳法住持并幹院事未幾嵩引去又以今釋長老智

昇次補其位一滴清淨之流演普及衆生四事畢給而
薰修雄成內院原乎震旦啟大千之界皆為淨土而積
高之陝或明神之所憑賢劫示百億之去待付國王而
大事之緣有諸聖之時現帝華撫運筆舌乎五教而大
墳常典傳歸乎東序之祕寶宸極繼志粉澤于先業而
冰綃壺墨分藏乎不死之福庭蚩蚩之氓含甘吮滋迷
帝力之所及沈沈之宇子來勿亟歸天保而在茲俾是
書也竝日月而麗乎天斯閣也以香花而散其處射者

不敢西向如畏共工之臺從昔未曾得聞更同如來之
藏祔宿官甫邇落成斯覲淳濯至化頌次成功銘曰
寬柔以教兮南方彊神明來舍兮壽而臧崇建塔廟兮
最吉祥聰明無運兮臻太寧雲漢章天兮奎鉤明名山
大都兮閎文經瑤函珠笈兮敞層構弇勒湯盤兮垂不
朽當來下生兮齊佛壽

成都府新建漢文公祠堂碑

蜀之廟食千五百年不絕者秦李公冰漢文公翁兩祠

而已冰為蜀鑿離培逐悍水以溉所及常無旱年西人
德之因言冰身與水怪鬪怪不勝死自是江無暴流蛟
蜃怖藏人恬以生故侈大房殿歲擊羊豕雉魚伐鼓嘯
簫傾數十州之人人必侍祠奔走鼓舞以娛悅神祝已
傳遐而後敢安公之治蜀開學校以詩書教人澡熨故
俗長長少少親親尊尊百姓順賴其後司馬相如王褒
揚雄以文書倡張寬以博聞顯嚴遵李仲元以有道稱
何武入為三公漢家號令典章赫然與三代等蜀有儒

自公始班固言之既詳初公為禮殿以舍孔子及七十
二子之象殿右廡作石室舍公像于中晚漢學焚有守
曰高朕能興完之後人又作朕像進偶公室歲時長史
率掾屬諸生奉遵豆饗醪薦之于前虔踞謹潔一再奠
而退辭無敢不信焉冰以功公以德功易見德難知故
祀雖偕而優狹異焉嘉祐二年予知益州往款公祠至
則區位湫隘蝕垢蒙不稱所聞大懼禮益懈忽神弗
臨享其明年乃占學宮之西改位鳩工弗亟弗遲作堂

三楹張左右序及獻廡大抵若干間布尋以度堂累常
以度廷疏牕以快顯壯闔以嚴閉采有青丹陛有級夷
瓦密棟彊若棘若飛乃肖公像于宁間繪相如等于東
西壁本古學之復莫若朕本今學之盛莫若故樞密直
學士蔣公堂故繪二公于宦漏皆配祠焉于是擇日告
成于神揖而升簋竚果湑脯脩紛羅而有容可以告虔
趨而降爨罇巾洗席燎並施而不恩可以盡儀相者循
循任者舒舒禮生于嚴廣靈安于閑寂故也噫自公之

來蜀之人自視若鄒魯宋興名臣鉅公踵相逮于朝先
帝時巨盜再作亂弄庫兵爭劔閣是時蜀豪英無一汙
賊者羣頑愁窘不容喘而滅非人好忠家知孝使然耶
所使然者不自公歟傳曰非此族也不在祀典公在之
矣則是祠之作願自予而古無俾壞息云祠之興同尚
之賢則轉運使趙抃及提點刑獄使者凡三人贊輔之
勤自通判軍州事祝諮以降六人營董之勞自兵馬都
監毛永保而下二人咸書像于西廂列官里于石陰銘

曰

公二千石兮守大邦冠峩峩兮紱斯皇出有瑞節兮車
騎羅石室孔卑兮人謂何新堂翼兮耽耽庭廣直兮序
巖巖吏奉承兮不譁神來徙兮此其家儼羣賢兮竝陳
公所教兮如其仁庖魚挺兮俎肉鮮神來享兮憺冤延
公教在人兮無有頗蜀賢不乏兮才日多俗祥順兮孝
慈公祀百世兮庸可知

楊太尉神道碑

慶歷二年春二月甲子詔書故太子太保致仕贈太尉
崇勲剛純義勇任重效顯有不懈之亮能斷之彊其追
諡曰恭毅申命史臣初譔文刻石且俾螭首龜趺如今
揭著墓阡馨香無窮臣初伏念天子所以褒禮大臣隱
悼幽顯霜遷樹拱猶無已時沈恩念忘漏入九泉受名
節惠不使有司得預雖礪山于廟固功臣之誓謹輦在
廷深將帥之思始終感會未有二茲者已敢拜手奉詔
紉繹功狀掇其功瑑于碑太尉姓楊氏字寶臣系出宏

農支商熾昌載質四方既貫燕薊世禪武力曾祖方道
任俠豪邁仕後唐高選涿州刺史合姓竇氏祖守斌善
射御以彊騎從太祖為龍捷指揮使授室孫氏父全美
志勇決噐安重扈執衛戈山立雲從終殿前指揮使左
班都知委禽王氏竝涵淳陰德益久彌大發越網緼歸
成後人公既顯率禰而上贈太師中書尚書令由祖而
下封鄂國公推妣及曾分祚楚韓秦為夫人國太尉事
兩朝歷二十八官其最著顯者由彰德軍節度相州觀

察留後領振武鎮南定武山南東道河陽三城五節度
以留務厯殿前都虞侯侍衛馬軍副都指揮使以節度
為殿前副指揮使宣徽南院使樞密副使樞密使再同
中書門下平章事守陳壽毫鎮定五州兩為河北兵馬
都部署皆國家腹心柱石天下所以安危者故上欲左
右有民惟公之為若鼎彝然所處而重若金湯然所恃
而安有牙童童有印累累以勤以庸元首是毗舉當世
賢臣魁壘骨鯁之輔待公而足公幼時以門廕事皇太

子宮太子訓之學因通書記刀筆絕不意狗馬弋獵事
痛折節比諸生在左右謹力自將未嘗以孰何見謝皇
太子即位是為真宗皇帝自東班承旨十一遷為內
省使由恩州刺史三進兼桂州觀察使公既藩邸雅舊
故敢言無所回隱每使四方督盜賊采風俗還奏有條
帝以為才其後數訪羣臣臧否切問通言世祕莫聞時
時有所建明帝未嘗不稱善更莅內司風績流聞當此
時益親近出入光寵同時等輩皆不敢抗茵憑几天禧

晚年貴臣投隙親置黨人握旣端于時公聯掌皇城密以情告厚利盜言或啗或訐公即計策其詐念帝久未豫今上居東宮若放命竊發謹動禁省雖食其肉奚足償耶即日白發其謀魁慝禽伏撲燎未然折蠱始搖保安宗稷繫公是力上自先帝時既聞耳矣及纂嗣遂以爪牙任之居中軍上將風力銳甚視嚴廊整整而度足和門暨暨而安星藩幔省居衛行護朝廷雄尊得公愈明久之進貳樞務章獻明肅皇后嘗目公謂上曰是先

帝所謂忠孝者用未及顯庸有待耶于是由第四署起
正使席會權綱有歸政體清明萬樞叢遠皆從臨決公
心經大猷膝造昌言底行將順甚稱上意明年使罷得
視丞相秩即淮陽開府仇家便文誣列曩寃執事間之
因以釋憾有詔罷宰職公一不自辯將命之藩責言靡
讎事久益直示箠食隄終蒙簡照歲餘還治宛丘北敵
丐盟使者結納未能得其要領于時以傳車召公入議
至則贊書已具若曰爾復以相印守博陵如漢灌嬰故

事凡兵在鎮定者爾皆統之公頓首陳謝退條禦戎擇
帥邊鎖所宜急者數十牘以聞謀謨卓詭乙夜被賞乘
轅北驅威先令行化勛為忤甲壽馬良士奮于行未幾
徙常山今宿帥王相國得用代鎮博陵與公相犄角當
一面諸將皆以兵屬師和帥賢敵謀益伐會戎譯講解
兵悉罷屯詔公入鎮圃田前此以壯趾之苦方事未寧
不啻有加至是固辭不拜上言疆場少間幸得歸節闕
下丐骸骨還丘園朝議重違故制授左衛上將軍聽老

明年冊拜儲保俸如居官乃薨享壽七十于是歲在大
梁閏五月己酉嗚呼公以大有之健中庸之不倚書之
攸好德出屏入輔文武是憲遁居成功休不待年其所
以經綸黽俛者卷納靈府完為和氣宜父且祺屹如岡
陵而遽溘逝蓋曩之瘁盡與今恬泊不相補歟或化者
自有數得正而沒賢所樂歟此上所以聞問鯁傷臨蒞
廢朝錫賙係路廡袞照室者已公為人有崖岸識詣精
明居常觀圖史博古今辯論感槩森如矛戟善為政推

勒豪彊苗犇髮櫛不使敗類初羣牧制置使悉雜擇臣
領之所以佐縣官經馬政獨公由監司至使任無慮九
年廐校數充蹏牝不乘及在殿衛二府亦八歲不他遷
勤官善職見倚于上乃如是質所樹立固宜有大者焉
厭難未萌先事電發勇之果也華首詣屯初不辦嚴忠
之壯也蹈道引年牖下歸全仁之固也假令陽秋可作
尚珍且貴奚止載太常之繚鏤景鍾之欒哉娶夫人王
氏姚氏田氏不偕公老生子十二人宗讓宗詡宗說宗

誨宗識宗謹宗諤宗誘宗誼宗諫宗詒為內藏庫使
說內園副使閤門通事舍人誨內殿承制識謹誘並內
殿崇班諤誼諫詒並東頭供奉官詡識諫早世諸子雖
食舊德皆能以才自顯于官詵詵也知公義方世濟厥
問烏可量已薨之年諸孤既辭詔葬則自發私稅與龜
筮謀得秋八月壬申克葬于開封府祥符縣鄧公鄉齊
公塋之子位夫難泐者有如石不朽者有如名行遠者
有如文且王命焉顯揚懿烈由行遠旌不朽托難泐以

示方來則公之系之才之伐之官何千萬年而有泯焉
銘曰

古人之勇撓于為利公聞悚言據正彌厲為君督奸羈
跽狂獠為臣之忠衰于官成避劇就安以保其盈方事
之難公乃奮行功名之際賢者罕處節整位隆公則引
去是是非非定于闔棺卒葬恩褒邦靡間言青史有傳
公列功臣朱門有閼慶垂後昆梁甸昀昀返流渾渾不
遷不腐茂烈偕存

范陽張公神道碑銘

公諱蘊字延蘊張其氏也詩春秋以來為顯姓胚德孕
祥代有其人惟公祖諱從實值石晉亂自范陽遷齊州
相地授田放志林壑惟公考諱光文能紹厥訓以萬物
為細不足納胷中與道頽靡弗引名自近再世不還莽
故公遂為厯城人惟公有子曰揆貫之曰揆文裕皆名
重當世貫之以給事中入翰林侍讀學士文裕以兵部
郎中充龍圖閣直學士由是累贈公禮部尚書夫人王

氏清源郡太君葬奉高鄉之黃臺里尚書之墓龍圖閣
直學士天水趙師民為之誌尚書之行琅瑯王彰次之
狀文裕以尚書品得碑神道焯寵賁幽乃磐緯石屬予
以辭予官吏官不得讓謹按尚書少明悟以隱正自將
事親瞿瞿惟謹與朋友信風義崖然雖服儒衣冠無腐
儒氣視功名若跬步可取者太宗時廷陞間將命皆欲
得雅才尚書始應選藉殿前承旨監冀之衡水稅舒之
羅源茶官稱職改換三班奉職以左班殿直為環州馬

嶺兵馬監押改左班選為淄州兵馬監押以累免官權
置壽州俄以三班借職召監大廣冶大中祥符四年夏
六月卒于官享壽五十六羅源茶歲入鮮而置吏專司
尚書身得其處不敢安上言願省冗員以茶界通判軍
州事兼領詔可故得馬嶺馬嶺瀕邊人皆晝負韃夜燒
烽以強力相賢未嘗知禮義文儒尚書始興孔子祠日
召惇老可人語以詩書曰習是可以為慈父為順子為
悌弟為愛兄遷善革頑弗犯天子法衆皆喜曰公不鄙

我我敢不從悉遣子弟學祠下自是選俗一變文人為
刻石著功在溜也方咸平初契丹擾趙魏乘冰壯游騎
度河關齊魯溜人駭舉將走山知州事者乃議縱之欲
身亡去尚書扈譙閭怒曰縣官財廩咸在壕堞尚完一
去此則强弱凌暴敵未至我先敗矣敵知我有備敢過
而東乎按劔橫膝曰有出者斬知州汗額羞恨吏欲戰
尚書即治戰具浚浚增庠守氣毅然後數日敵去由溜
以東按堵自若衆相語微張公吾等血丹野草知州儲

前憾陰攘尚書計為已功而白于朝會使者按狀尚書以實對吏惶怖共劾尚書妄言不讐請下獄遂連年不能決尚書訖不自明故下遷文正范公仲淹少客淄知尚書甚詳常謂今之士欲輩古人者惟尚書則無愧慶厯初經畧陝西至馬嶺見所謂孔子祠者咨歎久之美始興學並推明責守城事凡作文數百言瑒之石陰文正不輕許可人其實錄自視司馬遷比故士大夫知尚書忠且賢益明白不疑尚書好擊劔射御推步醫劑罔

不善賑贍姻宗弗為家有亡計也其訓子非仁與義弗
寘口授之學未進過時為不飯已進乃嘗故貫之文裕
由膝下日奮勵至大成竝擢進士第貫之性鯁亮行已
峭潔階級已遷不肯作沈浮事年五十餘宰相薦明經
術及所傳揚雄太元上召見延和殿問所以準易者貫
之對雄所言不謬于聖人又詔搢著作首其繇獻吉上
喜翌日拜天章閣待制兼侍讀數因古以諷撻筴曰某
事善今可從某事不善今可鑒上恣聽之無厭既退無

半語及省中故人鮮知者文裕性沈懿最能文辭外和
遜中剛固弗可屈名臣鉅公爭從取之出門下交章騰
辟竇元慶歷間西戎僭亂文裕從大帥經制敵事調軍
興策彼已尤悉常為一府冠後雖帖職集賢殿朝廷每
以劇任之自三司判官再為轉運使又以至成德軍領
本路兵馬都部署安撫使鉗吏奸療民瘠權鹽鐵用度
護西北勁兵處剖決精敏無留疑言儒而材者文裕為
無之其得君其任重肆大厥猷故未艾哉清源之喪與

貫之跣以送柩時天寒趾蹶瘡不置路人皆為流涕嗚呼以尚書卓行健明不推咎咎人引利利已知有子為之後也以貫之文裕蛻布衣入金門玉堂交武在天子左右知有父為之先也此而不銘尚誰可銘辭曰

孰如公之時才不克施孰如公之才不幸而災孰如公之報熾豐殿後孰如公之榮漏寵冥冥揭表于阡鏤美青完請視子孫俾信斯言

張文懿公士遜舊德之碑

惟宋四葉天以端命付皇帝既社南邦乃建元儲始御
資善堂參聽天下事真廟委成羣臣遵審訓奉上國寶
皇帝既位重光合華道益大興天燾地持罔有不承惟
其佐曰清河張公由戶部吏部二郎中直昭文館為壽
春及昇府諮議參軍以右諫議大夫歷太子左右庶子
進樞密直學士為賓客以樞密副使給事中領詹事出
入兩宮實輔實維逮潛而飛神攄景發首班天極上之
六年制詔有司先帝遺朕寶臣曰士遜毗亮厥初勤勞

我家外經內幹聲烈嘉飪罔德不酬朕庶幾焉爾惟相
且類台德前此公已三遷為尚書左丞乃以禮部尚書
中書門下平章事分執政事筆于是綱紀文章張設修
明公與二三臣協功濟虔風力銳甚因其故而奉行之
本其宜而財相之所以鎮浮扼動便安元元之道甚備
翕然號稱職相故樞密使曹利用素貴強宗子留鄉里
使酒不軌既具獄或謂利用竝坐上疑以問執政衆噤
嘿相顧望公徐曰利用大臣宜不知狀獨不肖子為之

時間語先入利用得罪公以議不合罷為刑部尚書知
江寧府宰相文正王曾亦為上別白曹事終曹氏復爵
土還所籍產官其子孫居二歲朝京師以檢校太傅領
定國軍節度知許州踰年用舊官復入相進中書侍郎
兼兵部尚書明年上專攬萬務除門下侍郎仍前官遂
總魁柄未幾以左僕射保留西雒時楊崇勳亦罷樞密
使以帥節兼台司同謝殿中班在公右帝憮然悟明日
授公檢校太師山南東道節度以宰相秩復守許昌公

不以漢相尊廢事事為政有體不曲折煩苛時時方畧
縱舍有足觀者賦更在民類先與期故所到皆有惠利
仁愛築大隄環城以障濼潦瘡積燥完戶免蟄愁許人
蒙休饒碧頌公移判河南府久之上推雅故復進公為
上宰盡還前在丞相府之領俄封鄧國公公既以年高
位隆萬或一悔有不勝任之責乃七表讓還印綬面陳
又十數雖上之所以拒而留者亦不勝記公執不回遂
冊拜太傅進封鄧國公聽謝特詔朝朔望大朝會並綴

中書門下班出入施繖與一子五品緋賜近城園一區
月給實俸國朝自中書得老者以公為初辭朔望惟朝
會一再至至必上眷矚加等或遣中侍者勞問嘗御書
飛白千歲二字賜公難老公因鋪叙前後所錫書九百
函為歌一篇贊成盛德皇祐元年正月己未薨于第享
年八十有六翌日問聞上駭歎趣外辦車駕或言曰直
陛下元命不可往上曰股肱實虧日子何避遂行哭之
慟賜銀三千兩布足醪米副之以太師中書令賁其柩

進陞宗黨官若職者十有六人嗚呼公字順之淳化中與鄉進士試禁中占對鴻徹太宗異之擢乙科調鄖鄉主簿射洪令以異政聞改襄陽令外憂自免還除秘書著作佐郎知邵武縣轉本省丞虢畧楊意在翰林高持風鑑少所器可薦公才堪御史因授監察御史頃江南轉運使闕中書進擬輒卻真宗不次用公執政賀上得人換廣南東路三遷至兵部員外郎代還授河北轉運使改工部郎中河甯棣州有詔徙陽信官見糧多不可

以遷公視瀕河數州方歉食即計餘以貸民年如約輸
入新郡振乏權羸衆賴以紓真宗最公治狀欲遂寘左
右會王府開面命公曰枚選于衆無易而才公拜稽首
遂用調護公身七尺進退安重中隱正外文明篤于孝
友根于仁愛一時士大夫歌艷成就出門下者皆名流
鉅人施予姻舊廩稍畧足不問在否幾何任樞省凡八
年後三至台輔去位又十年所遇不同而事皆可紀方
上諒闇冢司持衡排抵時望陰席權寵公居其間防檢

欽定四庫全書

學文淵
卷五十七

百為身俾長城慮先元龜妖脂讒具無所投汙然而卒
定大事蓋乾興時善公之謀章獻佐治軒陞重嚴公事
二聖外謀必聞裏言不宣孝承慈佑鴻名雙濟及乾剛
獨奮有弗厭者一切罷免而公見留宰相文惠陳堯佐
門下生竊出上書妄言變事又有譏諫官立黨者公還
奏上前質其誣讎于是告者結三歲刑諫官事寢不下
故明道間見公之忠者德復用上方厲精聽斷公朝夕
進見一力匪懈登峻顙良緝興化條太和嘉生蒸薄滲

流舉天下全盛視公所以致君至不至耶大抵相創業
者先功相守成者先德經綸之業易言而鎮靖之績難
知公可謂治世之傑輔皇極之全懿者已故寶元以來
著公之勞公之引年人間事一不概意閱黃老旁行書
粗以應外精以治內乘和日化與相頽靡再過鄉上冢
召故人長者散金為壽野服巾車不自貴其貴百社蕃
并化為康寧偃然歸下如蛻一委當此時搢紳大夫之
輩又善公終聖上所以惻怛悼痛舉哀外次三不視朝

有司謚為文懿匪公孰宜凡附官見職者審官審刑二
院史館會靈觀判官以近臣兼之契丹國信使在藩房
時帝所特選祥源觀使以宥密領之集賢殿昭文館二
學士監國子南郊大禮使獻懿二太后園陵使以執政
莅之邑戶萬五千七百勲階極品功臣出處更二十六
號公于書史多所汎覽為辭章深純典正尤嗜詩所得
皆自然經奇無所彫刷故禮部尚書清河張詠許為第
一流生平編次成十集既詔索遺藁家承錄五集以獻

遂秘禁中信乎有德而又有言者歟公之先蓋漢陽王
東之苗裔系牒湮落世教失傳至曾大父諱育從唐本
道帥趙凝府鈎校用度奏為大理評事凝破避兵汴漢
止均州鄖鄉道葬焉配曰郭氏大父諱裕試金吾衛長
史主陰城鹽鐵院配曰胡氏父廷郎隱約達世配曰趙
氏二龐氏李氏公能推恩以開府儀同三司太師中書
令尚書令郗楚韓三國公上追先烈以燕晉魏韓魯越
國封自妣而上五族太夫人公即魏國所生七日而母

夫人喪屬公于姑顧復勞苦至於成立公請于朝封姑為南陽縣太君其喪也如母而不緇姑子全氏贈太子左贊善大夫公娶姓三蔣黃氏追封晉陵英國二夫人馮氏封舒國夫人四男子曰友直刑部員外郎直史館曰友偁殿中丞曰友正將作監丞曰友誼奉禮部獨早世上卹其孤故友直為史館修撰友偁任親民官友正選大理寺丞薨之年夏四月癸酉克葬公于河南府登封縣天中鄉之原英舒二夫人祔焉諸子以叙公之業

有故吏狀節公之惠有容官議冊愍於朝誌埋于幽奏
終藏事無不如志惟緯石巍存可刻以磨若又著庸其
上顯摠無窮誰不謂然乃請而命史臣和繫以詞曰
惟天興雨有雲歆蒸惟辟撫期有賢挺生賢者謂誰英
英令君竭來于朝對我聖真帝啟南社實護且毗旣在
東宮陟降不違帝受冒珍瑞福紛綸負日當天四海復
晨內經鴻樞帝心以嘉三陟宰司并秉將牙公之在朝
施設有方百工儀儀莫匪峻良公之出藩人以阜安泰

稷熾豐靡厲靡患牢固歲空吏不傳爰老還第家為國
傳臣班視台鉉寵光益振陶天之和用克永年未始疾
憂委化而壇帝歎慙遺行不便時殮以袞章歿軫餘思
凡公猷為一代宗臣有勛在史有德在民昔周之興佐
成以功叶振權綱王道邇隆在唐之說輔明以嗣擁全
威靈大猷訖濟公視二臣孰為後先著辭表阡風烈永
傳

景文集卷五十七

欽定四庫全書

景文集卷五十八

宋 宋祁 撰

誌銘

荆王墓誌銘

慶厯三年冬十二月皇叔荆王疾病辛丑皇帝輦如其
宮見王卧内禮如家人上手為調藥王泣且謝即陳被
思三朝無以報厚恩今保首領仆牖下倘使有知從二

先帝遊死骨不朽惟以兒女長累陛下上惻然謂王素康強雖今小恙行且瘳敕近醫藥以自愛因賚白金五千兩王固辭曰幸一見天子奚賜之敢叨上高王之讓特詔從之明年春正月乙亥遂薨上即時臨弔哭之慟廢五日朝壬午御素服宰相率百官詣崇政門奉慰遣中大夫相其室以藏內事詔翰林學士臣某內侍省都知臣守忠護其葬以庀外事制詔中書門下其贈以天策上將軍賁徐二州牧燕王印綬太常上謚為恭肅又

詔臣祁爾應叙王治行縷碧款隧俾永其傳臣再拜稽
首伏自念懵學局聞不能周知王德今天子展親飾終
震動顯幽自王弗寧遣太醫高手踵相及于路逮終歸
賙不貲計比塋三酹其喪則上之所以眷王王之所以
承上其仁其賢方付史氏以昭無極臣雖缺然牽綴尚
懼稱道失當為斯文羞而日昃事嚴不及誤避是用詢
玉牒撫行狀次第其辭謹按王諱元儼太宗皇帝第八
子母曰德妃王于諸子最幼太宗特愛之終日侍左右

在宮中真宗嗣統王年十三始以檢校太保左衛上將軍兼御史大夫爵為公國于曹進拜平海軍節度使俄同中書門下平章事加檢校太傅為廣陵郡王授昭武安德二軍節度真拜王以榮為國稍兼侍中易安靜武信軍檢校太尉兼中書令大中祥符八年宮屋火延燬內廬坐火禁不謹削武信一軍節度降端王始築宮于外他日謝上痛自咎責真宗嘉慰之復以鎮海安化二帥節改王于彭冊拜太保以天平易安化拜太傅以永

清橫海帥節更王通繼授陝川大都督合保平定國兩
軍又王涇今上即位以地尊屬近進拜太尉尚書令仍
前兼以鎮安忠武二鎮徙王定賜贊拜不名又加詔書
不名頃之更王鎮賜劍履上殿拜太師以河陽三城二
節度即王孟翌日行京兆尹兼鳳祥尹即軍府為節度
乃王荆又進雍州牧兼鳳翔牧久之以國在荆授荆揚
二州牧即荆南淮南節度為大使仍賜入朝不趨大抵
賜功臣號者九其文至二十有四勲上柱國階開府儀

同三司邑戶二萬七千實食一萬二千四百人臣之極
摯止矣王美姿質眉目如畫廣額豐頤舉止矜重在平
居無少懈祀容恭朝容莊賓容肅宴容侃侃而和雖霞
之軒然麟之儀然瑜潤而葩鮮不足侔已事德妃尤謹
每有疾焚薰請命而王進飯視妃一再以增減居喪以
孝稱躬繪太宗聖容纖微克肖天光日潤若可就而望
者性開敏博覽文史好飛白書拂灑道妍結字甚工作
辭賦數百篇務求理致寡嗜欲左右姬侍裁令奉巾櫛

箕帚不受佞讒翦翦者或伺隙膚訴必正色折愧由是
內外無違言天聖以來王自以春秋高蒙殊禮不敢數
朝請常闔門申申以居會朝廷調軍興議省費王即表
上公使錢歲五十萬佐用度上不獲已權許半入以申
王恭晚節頗好絲竹亭觀日夜自娛蓋健粹所賦必有
寄于物而后能適云始天下之言貴而親莫若王而王
乃小心恭慎在骨肉間始終無纖芥使宗室本支日愛
以敦語德與功其何如哉孫宣公爽嘗授經必語人曰

王賢王也世以為知言娶夫人張氏彰德軍節度使永德之女循法度膺象服承寧王家以岐許晉三為夫人國不幸前七年薨追命魏國夫人子四人男曰允熙右監門衛大將軍滁州刺史贈博州防禦使曰允良鎮國軍節度觀察留後曰允迪靜難軍節度觀察留後曰允初汝州團練使諸孫嬪然或冠或笄問安也蟬璽龍乎庭來寧也鎮悅交乎闈此所謂朱芾皇皇室家君王者哉初魏國之葬也當王墓之次故即用其穴以三月庚

寅具鹵簿鼓吹奉樟宮自京師如河南之永安以夏四月癸卯啟魏國之塋從禮而合諸墓嗚呼王之為子孝為弟悌為叔父寵而虔為父義而有慈甲子一終啟手足焉未為頤而艾也雖然壽皇烈憑天祉駢鈕盤華餘四十年忠孝之範光矣榮哀之事終矣銘曰

太宗九支潞篤于病昭成弗永真宗受命潤邢蘇華並王而藩代天之工咸罔登年穆穆燕王太真所愛真宗則之寵錫光大上曰叔父屬尊以親不名不趨劍履振

振王最壽者夾輔顯承道具美完纖訾不興癸亥之冬
冰介木披楚陳尤甚祲氛前知困而遺忠神不奪守勉
訓諸子表貸醫咎上命中人悉取其書或筆或書分藏
石渠厥仗央央刻章煒煒詔從儉葬俾顯王美永熙西
原橋梓後先既利既安以佑來昆

皇從姪全州觀察使追封新興侯墓誌銘

侯諱從郁字仲文昭信軍節度使英國公惟憲之子女
曰莒國和夫人英公之禰曰潭王德芳自潭而上昭穆

嚴尊玉牒史官書之故不著獨著侯事侯幼悟警有志
行羣居而自修佚安而不流既就傳務學尤力臨虞世
南隸楷絕工射能命中景祐中悉召宗室觀書太清樓
詔侯賦詩應旨輒上帝稱善他日有詔褒美輦下榮之
于慶厯元年夏六月遘疾薨于第享年四十有四上為
廢朝勅中貴人護葬所以賙舍追卹之良厚留寔普濟
禪坊卜兆之未從且言懷也侯仕始右班殿直十遷至
左屯衛大將軍文州刺史爵階勲邑稱是配曰夫人河

東薛氏封丹陽郡君甚宜其家六男子世奕太子右衛
率府率世褒故太子右司禦率府率世將太子右監門
率府副率世秩故太子右內率府副率世觀太子右內
率府副率幼未名諸子皆孝謹以肥家則侯之垂裕當
有以致之者歲直浚灘始詔鴻臚啟殯即河南永安之
先塋月舍己巳日舍癸卯克葬贈全州觀察使新興侯
禮也昔詩人之稱文王其辭曰文王孫子本支百世我
祖宗受命而帝德溥流長過文王遠甚而其支胄蕃衍

雖千萬世尚無有底止則文字之傳可以已乎銘曰
帝孫之子燾我不祚嗣而承者何千萬祀

防禦使進封饒陽侯墓誌銘

今上景祐初念雅樂猶缺詔太常考鐘石之縣質同律
之制時羣臣多不能曉或妄以縱黍累尺改定均度上
依違未決乃自譜正聲付授樂家益召知音者以備顧
問于是左千牛衛大將軍克己字安仁以宗室子名知
音上遣使即其家俾製黃鍾大曲將軍疏牘論次成不

淹辱使者還奏大蒙賞嘆又進別曲十餘解往往流布
樂府將軍自為兒時已能言五音十二管夫婦上下相
生之法君臣清濁之差汪洋閎衍支派連著皆有所從
繪為律呂圖奏御其心解神悟殆天性然者習義之草
世南隸楷尤工會天子族讌酒中被詔試虞楷并有所
賦將軍既感千載之逢矜稽古之習援筆足言爛然盈
幅上益嘉之厚以金帛為賞嘗第所自為詩三百篇行
于時他日寢疾內夫人傳旨撫存將軍以寵待異等頓

首泣謝曰臣死不恨遂歿天下輟朝嗟悼贈深州防禦使進封饒陽侯自歟訖殯無慮所須一從官給嗚呼終之令而哀之榮謂將軍也歟顯考諱承壽均州防禦使祖考諱德恭高密郡王郡王之禍則秦悼王燾後隕祉源長而根殖也夫人長寧縣君武氏生三子叔詔叔曠並太子右監門率府副率叔褒太子右內率府副率慶厯四年既克葬燕王凡諸下之未兆者皆舉從之別遣內常侍將柳而南如汝州之梁縣敘安于先塋史臣被

詔刻石著將軍之行宜無愧辭銘曰

性也重厚不聲以色服也儒術惟敏而力仕由廷臣七
遷厥官階崇爵顯勲峻戶蕃謂仁必壽胡不我信侯年
四十嗒然委順孟夏癸卯克葬我侯息焉于此運往名
留

皇從兄贈虔州觀察使墓誌銘

秦悼王之穆曰廣陵郡王王之合曰南陽郡君張夫人
有子八房嫡房曰贈虔州觀察使曾禰不書尊帝也王

諱不書著也公名承睦以皇根之茂天跗之華芳酣烈
飪遂用蕃衍直質而不跲遜志而自修斤斤奉法日以
飾厲守貴而無驕色處樂而無流心自右侍禁踐八官
而至左領軍彭州團練使朝家厚宗室悉留京師雖疏
爵而王列藩而侯揭節而使佩印而相未有就國而操
事也不就國則親親之誼戚而弗疏不操事則優優之
祿肆而弗畏有如公高冠大帶朝殿阼之下量幣黃流
祀家寢之庭資忠移孝靡有罪悔奚其為政而後為之

功業哉命之弗諶享年四十有八天子輟朝行臨弔之
禮中人奉詔護喪窆之事出中帑以祔之廡廉車以飾
之棺于寢階殯于闕若須時也後三年歲值甲申分遣
使者啟菽樞卜夏四月癸卯還葬汝州之梁縣以夫人
隴西郡君董氏耐焉男六人克順克戒太子右衛率府
率克協克凝克伸右監門衛率府副率克橐右內率府
副率有詔史臣銘其壙銘曰

鬱鬱芊芊惟汝陽兮若斧若堂從家王兮子也承祀其

代昌兮

李郡王墓誌銘

皇祐二年秋七月有宋元舅彰德軍節度使檢校太尉
兼侍中李公用和以羸疾聞太醫更往治弗損丙申乘
輿臨問公病不能束紳卧簣泣謝上念公居告久又素
不殖產賜銀三千兩為醫祝費斥官舍百餘區歲餼二
百萬與之使長食其貲即賜所居為公第又以次子西
上閣門副使珣為正使二子一孫未仕者賦其祿皆拜

牀下甲辰公薨上震惻是日臨弔哭且慟賙稅絡繹遺命辭詔葬故遣近侍及中大夫職喪事冊贈太師中書令隴西郡王五日不視朝賜諡曰恭禧壬子帝舉哀苑次將卜葬以八月甲申吉諸子號踊荒痛乃庀具有詔葬日以本品鹵簿寵之又命史臣次王之行鏤石藏于槨謹按王字審禮系出隴西遠祖徙餘杭既又來京師故今土著始為開封人曾祖諱應己隱不自名曾妣曰沈夫人祖諱延嗣舉進士乙科終金華主簿祖妣曰汪

夫人考諱仁德以進士試有司數詘晚乃選為三班奉
職終左班殿直妣曰章夫人惟夫人克生元女嬪帝誕
聖柔風順教佐治六宮終享大號祔主廟祐是為章懿
皇后前後延賁三世並以太師中書令兼尚書令告第
以舒邢魏為三公國吳陳楚為三太夫人國戚鈿刻章
羅照窰塗王即后母弟少孤內行修謹釋褐衣召為廷
臣試事連最益知名以右侍禁閣門祇候出監考城兵
明道元年會章懿喪除禮賓副使其年大考宮室以分

護勞正為禮賓使明年改治后陵王參相奉安帝念后
昆弟惟王思有褒寵故擢崇儀使兼賀州刺史將驍騎
輕兵護梓宮明年詔王親展寢園還為寧州刺史改刺
澤州並本州團練使又遷慶州加防禦使拜鄜州觀察
使自賀及鄜不即州領皇城兵寶元二年仍使號充殿
前都虞候俄加永清軍節度觀察留後以帥職出為真
定府定州路兵馬副都部署踰年遷侍衛親軍步軍副
都指揮使更為兵馬都部署召還視本司事未幾改帥

馬軍慶厯二年拜建武軍節度使充殿前副指揮使久
之以建武節進檢校太傅充宣徽北院使不踰月授彰
德節同中書門下平章事王既尊戚慎將當日進見省
戶下故不之鎮留為景靈宮使居再歲升門下二品王
臨事強敏然性靜畏見可以佐縣官者避戚屬未嘗顯
爭得失率一二密對故外莫得聞不為狗馬玩好驅馳
弋獵不立居宅檢御姻族使循法度此則馬廖之慎也
先后之啟故陵瀝沁方中詔王按視中外為懼王不一

辭措枉于人物色申右帝意解故簿主者罪往往得原
此則樊宏之畏也前後居爪牙任為國禦侮巖廊尊榮
不疎不諱退視微道按周廬省幕府文書惟謹建白時
當有司率為故常在河北尤善撫士修完器械勉怯為
勇易單為牢悉公錢享部校僚屬無留私景祐中再郊
王兩為大內善守此則申伯之武也初王無第詔權舍
芳林園王以禁籞非人臣所居固辭更假今第此則竇
長君之能讓也領殿前兵歷四替後數請間避劇任帝

曰叔舅誠年高尚煩以職事非所以優之由是開府視
宰相每朝會大宴與執政聯坐鳴玉珥貂進退恂然親
寵第一嘗屬疾輦過候安否勉醫藥賜予千萬又以王
經過郊墅別賜銀飾安輿此則鄧隲之貴也大抵外戚
在朝廷預進退士干議論則近權權且有黨滋貨買田
通四方餉謝則近侈侈則多求王居常謝賓客罕所薦
進朝或大議論不敢知故無黨無黨則權不往用度一
出俸稍抑絕苞苴其為子孫謀盡仰所賜產故求寡求

寡則侈不至且王肺腑要重苟有開說于上勢宜聽糜
金錢嗜所欲厚自奉養人亦無所詆疵而天資儉約終
不舍此為彼使屬任之恩始終蔭密不曰賢哉凡功臣
號再加階光祿大夫勲上柱國爵開國公虛食邑四千
戶夫人王氏以淑懿之行助宗事幹內法偕王之貴封
榮國夫人生男子九曰璋珣琚琦瑛瑱瑒瑛某璋為眉
州刺史兼防禦使領龍神衛四廂都指揮使珣即前拜
閣門使者琚琦瑛球皆任內殿承制崇班瑱為濱州刺

史初上欲與王世為甥舅故詔瑋尚福康公主主待年
瑋前拜駙馬都尉瑛為東都供奉官早夭贈如京師某
州刺史或以沈果進或以敏幹聞或以謹厚選其能濟
王之美而不隕也惟邢公而上墳墓在餘杭自魏公始
塋開封府祥符縣鄧公鄉原窆于昭位今克葬王于魏
公之左為穆位禮也昔秦康公以路車乘馬贈送晉侯
作渭陽之詩人微事陋仲尼以為可傳追什其風況乎
寵外家褒哲輔卹終表賢儀物典冊光明肆大極天子

親親之恩慰先后在天之慈庸得不識銘曰

王之先赤馬綿綿乃自餘杭引而北遷允顯魏公始賜
家田度汴之陽大表厥阡王之貴照發于他帝所自出
親則舅家忠力謹庸福祿是荷台臣之印上將之牙王
之亡帝慟且傷五不視朝哀襲總裳師令王爵追密厥
章歸賵易名恩縟于常王之葬圖于塋穆既有秘器飯
珠贈玉鼓吹轟錚旂旒熠煜我且不朽彼則陵谷王之
後詵詵而榮或築外館有提衛兵珮鉞其珩冠翠其纓

爾公爾侯永嗣家聲

文正王公墓誌銘

景祐二年丞相右府缺上方圖任耆俊參付魁極越二年制詔太原王公曾其上樞密使印綬還來相予進拜尚書右僕射門下侍郎所以命賜之尤渥公拜稽首讓弗遂于是擇典訓庸以熙百工外懷通協以種九德飪味燮和辰階比平翼戴聖猷溥大光明廼十一月從欽天柴胙沂以為公國他日請間伏青蒲上陳瘁藹嬰霜

露以跽願前此納政避賢人路帝憮然無開可意公執
不奪卒改左僕射加資政殿大學士鎮東平戊寅仲冬
感疥門子謁急書聞亟命將高手醫跳驅起視不半道
丙午公薨上推甲子得三百六十六復所生之辰家丞
列治讓還鴻臚典葬天子悼遺老之弗憇也再所置朝
獻左貂以禭法賙備厚恩錄宗姻僚陪十人容官合文
正二言以謹周道公之喪來京師其引也蓋殯也邦人
官師沱涕相弔明年有司持丁亥詔書到公第仍舉中

書令密章以告愍冊焜煌再漏下泉本公之綢繆感會
寵存賁往有以致者其如仁歟其司直歟公字孝先由
逸民霸飛遁天漢顯基素德支裔屢徙今為青州益都
著姓曾祖諱鐸祖諱繼莘皆陰儲世烈考諱兼甘節難
進終著作佐郎深根後源藁沛來祉公貴推澤並贈開
府儀同三司尚書令中書令爵皆為公大王父國于越
父國于魯妣曰張別贈燕夫人曰何為魯夫人公即何
夫人之子軒渠卓異魯公曰是大吾門八歲終二喪斬

欽定四庫全書

景文集
卷五十八

焉致毀仲父宗元育之過所生一情以均公亦以所愛
事仲父如父甫冠與鄉士游汎博書記不為章句儒諸
老先生皆折輩行以交咸平中偕郡上計委符入闕策
進士再為天下第一當此時二篇賦學者爭傳都紙以
鷓鴣王佐期之初命將作監丞通治濟陽代還試政事
堂以大著作直太史服五品判三司戶部案轉右正言
知制誥服三品充史館修撰入翰林為學士自司計外
郎再遷至中兵拜諫議大夫參議大政加給事中以禮

部侍郎守應天大名兩府復二鼎席兼太子賓客由左
戶再遷至春官卿以內書侍郎執宰相筆陟東臺兼地
官遂躋上衮閱五歲琳宮火一昔焚冊災異免以天官
為本州又易天雄軍即拜彰德軍節度使檢校太尉稍
換天平軍檢校太師俄同中書門下平章事徙判河南
府入冠樞極罷幢檠還家宰他如故公由布衣跼君門
譽處時行為龍光景武凡三十七年別任九判大理尚
書都省登聞檢知審刑審官禮儀院通進銀臺司門下

封駁事涖三班院糾察在京刑獄領使五持金絮遺湟
水酋為生辰使輦謁譙祠為考制度使館寓神嶽以中
台為會靈觀使高真寶符以元輔為玉清昭應宮使再
見上帝為南郊大禮使主工部一由集賢殿昭文館及
西清之秘為大學士三監修國史一階一品勲十二轉
表功十有四字食虛邑萬有二千五百室實五千一百
室此踐揚隆赫其大較也初契丹侵邊濟為褰服最近
早符晏檄悉索賦佐軍興公由倖事疏一二便宜數奏

蒙可衆器其能天禧夜妖自三川相靡而東公守睢陽
不逞讎恐里閭晝闔公闢牙門分吏曉勒捕先倡者鞭
梏之妖熄不復南築雒都城周萬雉雲陴言言辰居以
尊復陝路轉粟歲二十萬饒得無乏歲旱蝗齊楚周什
八以上民曹逃貸困粟鄉縣株送公一切榜遣流瘠更
生以千計所至立學官分租俸助興作五州鑄金石以
頌魏人畫像事之課治者以公為尤綠圖夜降度宮以
儀典客礱石庀材規創萬楹公列五害願省捐制度奉

承大中之意先帝弗豫太子已決事或議長秋臨政愴
人甚語翕翕公時調護儲邸謂后姻倖曰太子長秋誼
不獨立有如兩宮相維社稷安矣后悟由是內外恭順
無違言莊獻總軍國儀不時立佞黨投罇廷議放肆公
獨引東漢故事朝則帝在左太后在右施簾自障羣臣
奏事如前詔如公請長樂上微冊供張天安殿中公執
不可改御文德差損宸座志在彊王室安外家使無纖
芥納忠者以公為蓋大理總天下獄異時為冗帝欲重

之公自西臺被選平亭訊讞許自辟丞屬遂踵為故事
法家有違制而情不一公請非親被以失論會具獄須
報公據前例帝曰自是無復有違制耶公曰如陛下言
亦無復有失者帝悅更從輕坐語材者器公之果踐內
外辭禁贊為名命渾灝炳純溯古同風或選為昌言或
永為賡歌則家集合五十六篇詳矣上始鄉學公采聖
君賢臣事繪解為三十篇因以勸成德美語鏤于槧徧
賜邇臣其他纂次尤多尚不錄言文者歸公之洽嗚呼

惟公侃然正崖然立周密靖慎久而無流心在上前開
陳處可辨博有餘言為國家用至日旰出沐燕私訖不
道省中語天資方重每廣朝大會盛服玉色郎謁者視
進止如有尺寸未嘗過缺雖妄庸人歷咄詆亦不能加
半言毀短于公當國七年萬物茂宜四夷休寧稼茨于
原兵仆于鄙嘉生回薄無有恫怨務大體若丙吉清淨
如曹參總領衆職如魏相內文明如鄧禹于時被公之
化察察者敦沾沾者愧建啟露門秘禁台惇儒碩老侍

勸講復諫署舊員使正辭審議日興于朝進賢不植
私愛士不謀黨退不肖不奸怨奉羣母孝于諸弟友親
族可任言之上不可任厚分之財姻婭進用皆以嫌自
退上嘗大署忠亮忠厚四字錫之天下稱為賢公乾興
天聖之際時多故矣身荷重任為國休戚雖參和傅會
權定大事殲彼怒牙浣其他腸庇焉如憚懔慮焉如著
蔡然至閒居獨念猶感慨以之是必彌綸之才軋于羣
媚而未悉獲騁健粹之氣有所難屈而弗慊于心煩慮

焚和且至大病斯可慟已先時大星辰落郡寢上左右
驚白公曰後一月乃自知之如期而始悟寧傳箕蕭昂
有憑以始亦有以終耶君子謂為知命公始合姓于蔡
實處士光濟之女又合姓于李故相文靖公之女卒繼
室以其妹芳猷淑則迭映中壺後夫人獨偕公老故啟
許國享脂田焉晝哭未期又不幸以榆衣而復母弟曰
皞字子融為刑部郎中直集賢院曰憫字孝德終國子
博士子四人曰緡緣縉續緡止光祿寺丞緣天關續止

將作監丞緯為光祿寺丞緯之幼公取皞子繹以嗣及
終又命之故繹即喪序今為大理寺丞祕閣校理公之
捐館以大墓無穆位不可以葬乃改卜于滎陽惟新鄭
吉又筮于臨濟鄉惟梁原吉先是蔡夫人之歿已耐于
姑歲在單閼冬十月乙酉子融與繹等竭誠信舉公及
二夫人之喪合窆新阡順也且求狀于太子中允直集
賢院富弼又自哀公行事一篇合前後贊書見授而為
之誌恭惟令君之德在生人其憲度在臺閣其言在謨

命其履踐在國書其人與不可傳者皆亡矣今所据次
姑舉措紳所道者著于篇而納之壙中銘曰

斤斤令君竭來山東利見國光參偶時龍既奮厥庸遂
為宗工訂平津之封兮上初纂嗣毋違參治揭日當天
竇相以濟讒胥不搖王室無恙賴陳平之智兮五藩于
宣既仁既賢邦民宜之厥猷茂焉乃建將牙乃示台躔
繫吉甫之憲兮鄭圃聯圻泉塗啟扉刻章美櫜終天此
依九京千載食仰餘徽惟隨武之歸兮

僕射孫宣公墓誌銘

聖上嗣位之初丕承淳烈將以雍言布度召雋老惇儒
入崇政殿中以興金華之學時惟樂安孫公與皐顛魁
壘授道帷幄辰告日躋淵靜揚休出入十年厥猷茂焉
乃天聖辛未歲以惇暮告勞上還所事天子雅貪公肅
父之望倚以訪逮需奏三上皆不報公面自陳啟頓顙
流泣帝為改容第許以兗州之章申几杖之俟猶命講
老子三章重以束帛乘馬襲衣環帶命賜備厚沖概以

光乘輿燕于太清樓別詔近臣餞于瑞聖苑敕預會者
賦詩必類且錫天什寵賁其行師臣禮遇夙無與二公
居東一年上書求謝悃悃愿確朝議重違進拜太子少
傅以安車還汶上明年夏五月感疾甚篤己丑奉禪衣
復于東榮寘明道癸酉于是公之生七十二年矣計聞
帝震悼廢朝制贈文昌左相贈泉二十萬錄孤若孫一
官易名曰宣嗚呼哀與榮更相終始其所以得之者有
猷有為故耶公字宗古代為本郡著姓由公徙居于鄆

今又為鄆人諱霸曾王父也練王父也翌烈考也饒夫
人嫡妣也丁夫人繼妣也率祖而上皆毓德丘里不經
世務考槃在志以篤睦肥家叢鬱慶祥僕公而發烈考
累封光祿少卿致仕贈兵部尚書二夫人以鄱陽濟陽
二郡貴湯沐之典從子貴也公強志精力為諸生時已
通五經之說百家之藝游長者間久之名聞京師端拱
中擢明經高第自釋褐閱十七官更五職咸以最顯由
莒縣主簿授廷尉平參大成均之屬轉本寺丞遷尚書

省又講經于諸侯王邸升奉常為博士入尚書臺為屯田都官職方三員外以司平中兵二郎中待禁閣之制改諫議大夫給事合六官踐其四以小司空累遷至太宗伯並兼玉堂講勸之任小司馬時又帖秘圖侍從之職裕于德而撫于仕也蒞十一局為審官三吏銓三班各一其啟擬無滯材署銀臺封駁再判國鼓一其進退無壅情糾京獄罰以麗使牧校騶斯材總大農事以給太常太學客官皆游領焉舊章之不忘抑公是賴三守

邦治高密五年孟津三年魯郡再並期年仁厚愛利除一切之禁風聲化條為二千石表簡任之尤者則章聖上封之歲假節境上諭安遼人通聘于鑒無間之落又接其使于藁館道二國之言無私冊號鬱蒼介使軺之華程較俊選精官材之辨增修商彝舊任寵其遺利歸之縣官十累階止正奉大夫七論勲至上柱國開國爵為公食邑稱是其發揚烜赫如此在太宗時輦過庠舍公自下陳捧經升階講說命三篇因古順諷音旨華暢

帝大褒挹即賜五品袍魚羣聽始竦在真宗時屬柴梁
岱橫河汾擁符瑞之富羣臣爭欲推天意興希濶之事
天子方憑翠帽彷徨瀨鄉之區眇然以思聖真之遺風
公獨建言危微之本茲乎所忽且引唐開元終悼後艱
為戒帝亮其懇至多所開納然猶著論以剖公之疑時
郡國多上瑞物公間得見具言珍禽異卉為和氣所蔓
以昭盛德然脫有竄偽非應天之實又言道家祠醮所
費不貲以愛嗇財用為急書數十上啟心進熟靡所回

隱皆可以紓國庇民興天下長利卓然有古風烈彼齷齪容容毋忠固意且不得與公徒隸齒真可愧也及在經省則取無逸篇繪圖以進詩書道前王喪亂進讀者臨文卹忌或粗畧含糊公獨不然必為正言之冀以多誠故常有所裨勸能納君子善矣公之典禮也始請無祈穀而後農冬至侍祠于郊以天神醑食宗廟復二舞雍徹孔廟三獻有官迄今奉行為故事唐禮祈穀大雩大饗並祀昊天五帝國朝因之公上言位號重複不合

正禮且天無二帝特以五時生育之功強為六名冬至
園丘宜罷五帝位孟春禘感帝位日于東月于西以會
禮家大報天主日配以月之文雩饗宜祀五帝不設昊天
攢題事下有司咸謂祀為大事舉而廢之不以疑定
議卒報罷然服公論據精洽願下其書于史館則神不
瀆矣初公惠五經章句浮長刪為節解數百篇取九經
之治要著微言五十篇實被詔獎作樂記圖承詔撰崇
祀錄次五服年月為一家之言奉和兩朝聖製著賡載

集體尚沈雅不為華藻自七經之疏皆與刊正史志子
篇律學未鏤官槧以次建白自是流布學者仰之殆如
杓然終始典于學矣舉動溫重外和而內莊譬于莫在
匣隱然常若可畏何隆名重器不植黨援而盜言哆箕
無所竒中由慎密以自將歟性純孝篤于溫清既荷囊
珥筆朝夕禁近不得休沐過家而烈考尚書又重去鄉
里歲時上壽公勿及預數上書辭官從養帝頗難之于
是有左符之授再徙地益東蓋公志也尚書年過九十

公亦耆指使尚就子舍曳班裳言不稱老養者以為榮
及時侍疾也不嘗藥不進不復飯不甘鄒魯之人多能
言其行練達臺閣制度有咨無不得判議者以許東京
胡廣而持正過之善知人精于評鑒今左戶二卿始平
馮公初在黃綬公亟薦于朝至于光大發舒綢繆累聖
與接武露門俱名儒宗及馮浴堂之召遂讓其班而居
公下清議咨美其他推轂士甚衆雖未大顯皆休有令
聲俊乂用章繫公為重處約居易讓夷難進不疲利于

回不愧祝于辭甘是介節訖無恫悔及菟裘之還也召鄉人諸父揮金以為歡海鯤冥鴻所造而適撒瑟之夕前處正寢以諗考終之期物怪氣焰罔形請禱獨召子姓以授治命屏御不使進且曰以齊吾終遺禮惓惓止于獻納傳稱得正而斃焉斯已矣又云既歿其言立此之謂不朽如公實參有之夫人天水趙氏服珎鈿之華能循法度老不逮享追封本郡三子長曰瑤次曰琪季曰瑜由公任各以材力進瑤厯司虞員外郎琪為屯衛

丞並早世瑜今為殿中丞諸孫逮公之廕為卿寺屬者
五人殿中君以公殞之未祔求為本州賓介怵懼摧怛
奔問于陽卜得今丙子歲冬十月癸酉吉奉公及夫人
之喪克窆于某縣某鄉某原從先塋之穆位順也以邢
曩為經生實被公薦參掌儀署又節惠以舉周法知公
之績也熟見託論誤是用次叙其行而納于窆埏銘曰
猗歟公之文慮憲東彝式是古訓進為經師挾策立言
刪刻游枝寧其蕤兮猗歟公之仕丁辰展美其升頽然

其纓華止不蹈九折安我六轡坦斯履兮猗歟公之德
方嚴直清鎮浮含厚不伐存誠匪躬蹇蹇受命青青時
則行兮猗歟公之老在汶之陽貴屏國爵字發天光弋
者何慕鷦鷯已翔壽俾臧兮我鬣封兮序光域累密璽
兮照窈窕子克荷兮孫繩繩奉二尊兮安此宅裒善猷
兮刻沈砥砥可泐兮名無垠

景文集卷五十八